



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8 Yangia anidakangma : Tir Yimiyim tiryimiyim@aolima tir yimiyim TAPAK 10



Taoba Afghan tir Hamid Karzai-i Taliban lenir den ajurutep

Tanur ka surgery atema Andrejczyk-i Olympics medal auction asü



VOL. XVIII NO. 306 (ADOK 306) DIMAPUR

YANGTEPNÜ (THURSDAY)

LUROI (AUGUST) 19, 2021

₹ 5.00

Nagaland nung tanü nungi Unlock-5 tenzüker

Kohima, August 18, 2021 (TYO): Brihostibar nungi Nagaland nung Unlock-5 tenzüksü aser iba ya September 2, 2021 tashi asütsü.

"Nagaland nung COVID-19 tensa reprangshimer talenbatem salayonga arur. Health & Family Welfare Department aser District Task Force balala nungi osang agitepba sülen telemtetbatem agir" ta Principal Secretary Home Abhijit Sinha-i Bodbarnü metetdaksü.

Chief Secretary J Alam menden ser State Executive Committee on COVID-19 ajanga August 19 nungi September 2, 2021 tashi Unlock-5 alitsü telemtetba agi, ta paisa ashi.

Taoba mapang lokti, tamangba yimsü, shisaliok, sobaliba aser saisapong dak sendakba sentongtem nung nisung 50 tashi dang adenshitsu temelaba liasü saka Unlock-5 mapang nisung 50% tashi adenshitsu melar. Ajisüaka, sentong nung adenertem dak shirangba yimya malitsüla, COVID-19 vaccine agirtem mesüra mezüngbuba dose agir anogo 15 süir asütsüla, ta Principal Secretary Home-i metetdaksü.

Temalen agüja aliba telatetba kübok madenertem COVID-19 negative test report abentsüla. Ibaji RT-PCR/TrueNat/CBNAAT ajanga tendangba asütsüla aser tendangba sülen anogo 15 ano majung asütsüla, ta paisa ashi.

Sorkar office tem nung Group A aser B ketdangsurtem 100% attendance aser tanünga mapa

COVID Nagaland: Nisung 29,331 nungi 26,826 taneptsü nguogo

Kohima, August 18, 2021 (TYO): Bodbarnü Nagaland nung COVID-19 agi shiranger nisung 88 taneptsü angu aser 57 dak putet.

"Tesüiba ghonda 24 tsüngda COVID-19 agi shiranger nisung 88-i taneptsü angu. Parnokji Dimapur nung 41, Kohima nung 19, Mokokchung o Tuensang nung tii (8), Peren nung 6, Wokha nung 5 aser Kiphire nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Parnok züngsema nisung 26,826 taneptsü nguogo aser ibaji COVID-19 puteter nisung 91.45% taneptsü anguba lir, ta paisa ashi.

"Bodbarnü nisung 57 dak COVID-19 putet. Parnokji Dimapur nung 22, Kohima nung 17, Mokokchung nung 7, Longleng o Wokha nung asemsem (3), Phek nung 2 aser Kiphire, Peren o Tuensang nung kaka (1) lir. Parnok züngsema COVID-19 puteter ajak agi 29,331 kümogo" ta Dr Kikon-isa metetdaksü.

Tang COVID-19 puteta anepalur nisung 1,056 lir, ta paisa

inyakertem 50% attendance asütsüla, ta paisa shisem.

"Secretariat aser Directorate tem nung inyakertem asoshi vaccine agitsü latetba ama Nagaland nung tanünga sorkar office tem nung inyakertemia COVID-19 vaccine agitsüla. COVID-19 indang vaccine dose ka danga magirtemi anogo 15 shia COVID-19 negative test report agütsütsüla aser ibaji Government facility nung angati tendangtsü" ta Abhijit-isa metetdaksü.

Unlock-5 mapang sorkari two wheeler taxi aser tesülen amentsü temelaba agütsüogo saka ibaji passenger vehicles atema SOP lateta aliba ama asütsü.

Outdoor parks, entertainment parks, recreation areas aser iba mesükba tesemtem nung 50% adenshitsu melar. Item tesemi aoertem (tanurtem dena) dak shirangba yimya kecha malitsüla aser arishi küm 18 ser temapurtemi COVID-19 indang vaccine mezüng dose agir anogo 15 bo süir asütsüla. Yamaji mesüra COVID-19 negative test report abentsüla, ta Principal Secretary Home-isa ashi.

Nagaland nung Class 10 aser teküpok atema school melapoktsü aser tang tagidak online teaching dang inyaksü, ta paisa metetdaksüogo.

Unlock-5 mapang District Task Force (DTF) temi pei pei district nung talenbatem akangshitsu mesüra salatsü tashi agütsüogo, ta Abijit Sinha-isa metetdaksü.

shisem.

Tanü Dimapur nung COVID-19 puteta alir nisung 1 asü aser iba ya züngsema tasür ajak agi nisung 608 kümogo saka nisung 14 bo tanga tashidak ajanga asü, ta Dr Kikon-isa ashi.

"Tang tashi nung COVID-19 alitsü akok ta temolung melemi bilemba sample 294,123 tendangogo. RT-PCR ajanga 105,140, TrueNat ajanga 71,881 aser Rapid Antigen Test ajanga 117,102 tendang" ta paisa ashi.

"Mongulbar tashi nung nisung 642,391 nem COVID-19 vaccine indang dose 817,612 agütsüogo" ta State Immunization Officer, Dr Ritu Thurr-i ashi.

Vaccine agirtemji frontline workers 60,840, healthcare workers 15,986, arishi küm 45 ser temapur 190,020 aser arishi küm 18 nungi 44 tsüngda alir 375,545 lir, ta paisa ashi.

"Vaccine agirtem rongnung nisung 175,221-i dose anaprong agiogo. Parnokji frontline workers 42,430, healthcare workers 12,762, arishi küm 45 ser temapur 10,874 aser arishi küm 18 nungi 44 tsüngda alir 7,945 lir" ta Dr Thurr-isa metetdaksü.

Nagaland sorkari Tribal Hoho tem den senden amen

16-Point Agreement ajanga sobaliba ozüngtem amshitsu tashi agütsür



Bodbarnü Chief Minister's Residence Complex, Kohima nung state sorkari Nagaland nung Tribal Hoho tem den senden amendang agiba noksa angur. (Kohima, August 18)

Dimapur, August 18, 2021 (TYO): August 18, 2021 nü Nagaland state sorkari Tribal Hoho tem den senden ka menogo.

Senden nung Chief Minister Neiphiu Rio-i okila jembidang Peren aser Dimapur district tem arrtsü shitak ladangtsü indang ashi.

"Peren aser Dimapur district arrtsü ladangtsü atema August 2019 nung Health & Family Welfare, Pangnyu Phom lenisüba kübok sorkari Cabinet sub-committee ka tentet" ta Rio-i metetdaksü.

Cabinet sub-committee-i jungjunga asüngdangyaba aser reprangshimba sülen 'administrative boundary' ka shidang saka district anaprong nung alirtemi sobaliba aser inyakyim nung ajemdaker arrtsüji magizük, ta paisa ashi.

"16-Point Agreement ajanga Tribal Council nem sobaliba ozüngtem ketdangtsü tashi agüja lir. Naga kintem dak sendakba sobaliba aser inyakyim nung mangatetep ken o tem bentetsü atema Tribal telok ka nem agütsütsü tim ta angateta, sorkari Nagaland nung Tribal Hoho 14 nem district ana nung aliba kin lenirtem den ajurutepa sobaliba inyakyim nung arrtsü ladangtsü atema telemtetba agi" ta Chief Minister Rio-isa metetdaksü.

16-Point Agreement ajanga state nung jenjang nung Naga Tribunal kati Appellate Authority ama inyaksü tashi agütsür. Iba

ama Tribunal ka nung sobaliba ozüng meteta alirtem shimer aser tanü-asüng okadakter mekoktetba ken o tem kokteter, ta paisa ashi.

Nagaland nung sobaliba ozüngtem zülua ayutsü nüngdaker kechiyong iba ajanga tarutsü anogotem koba mapang sobaliba ozüngtem benshitsu'ar jangjatsü. Naga nung sobaliba ozüngtem tezüluba nung aliba ajanga item ozüng amshitsu mesüra Central mesüra State ozüngtem amshitsu jangjatsü. Tarutsü anogotem Nagaland nung High Court balaka alitsü aser iba jagi sobaliba ozüngtem zülua ayutsü kanga nüngdaker, ta Rio-isa metetdaksü.

Naga nung taginüba aser temetentem kümzüka ayutsü atema Register of Indigenous Inhabitants of Nagaland (RIIN) mapa tenzüksü nüngdaker saka kasa mapang nung India sensotem nem tim temeten agütsütsüla, ta paisa ashi.

Nagaland nung Women Reservation aser Urban Local Body (ULB) elections atema ashishitep ken o tulu adokogo. 2008 nungi sorkari ULB elections magiteta arur aser 2017 nung agitsü merandang nisungtemi lungkak ait aser lendong balala ataloka liasü, ta paisa ashi.

Iba tatalokba sülen August 2018 nung Cabinet Sub-Committee ka tenteta khuret reprangshima liasü saka parnoki iba tebilemtsü mekoktet. Nagaland nung ULB elections

magiba ajanga Finance Commission kübok senotsü tangutsü alibatem mangur aser terenlok mapa meinyakteter, ta CM Rio-isa metetdaksü.

"Loktiliba ainba den külemi ULBs ama reju tasentem adoktsü nüngdaker. Asenok sobaliba nem alenbanger malitsüla anungji Tribal Hoho temi tangatetba shitak nung ULBs nung tetsür nem menden lezmüka yutsütsüla aser tekaratiba nung ULBs election agitsü atema angatetteptsü ayongzüker" ta paisa ashi.

Rio-isa Gaon Bura indang olen ka ashidang yimtsüngtem dang nungi jilatem nüngdaktem balala lir anungji jila nung Gaon Bura shimba ya meputep aser iba ya meyipa reprangshitsu nüngdaker ta metetdaksü.

Tanü senden nung Geology & Mining Minister, V. Kashiho Sangtam-i Peren aser Dimapur district tsüngda arrtsü ladangtsü atema jembia aruba osang lemsatop, Commissioner, Nagaland, Rovilatuo Mor-i Gaon Bura, Principal Secretary-i ULBs nung Women reservation, Secretary, Justice & Law, Ngamjok Konyak-i Naga Customary Law nung aliba ama Naga Tribunals aser Principal Secretary, Home, Abhijit Sinha-i RIIN indang onüktem jembia liasü.

Senden tatem nung Planning & Coordination, Land Revenue, Parliamentary Affairs Minister Neiba Kronu-i anküp tepela o jembi.

Northeast nungi NAT 2021 angutsüpurtem

New Delhi, August 18, 2021 (Agencies): Union Ministry of Education-i Bodbarnü National Award to Teachers (NAT) 2021 atema shimba tesayurtem tenüng metetdaksüogo.

Taküm küm linük nung tesayur 47 nem iba sempet agütsütsü.

India nung tesayur tajungtemi shilem agiba atema National Awards agütsür. Iba sempet yagi parnok nem tetushi agütsüba dang masü saka

parnoki bendanga agüja aser meranga inyakba indang tenüngsang agütsür.

Parnoki school education indang quality jungdaktsüba dang masü saka kaketshirtem indang taküm melenshitsu aser ibaji ajiteta sempet agütsür.

Kümshia Minister of Human Resource Development (HRD) Ministry ajanga linük nung tesayur tajungtem nem National Awards agütsür.

Northeast India nungi

National Award for Teachers 2021 angutsüpurtem:

Mr. Duda Sora (Arunachal Pradesh), Mr. Kangkan Kishor (Assam), Mr. Binanda Swargiary (Assam). Mr. Sib Sankar Pal (Tripura), Ms Jacinta Vanlalengzami (Mizoram), Mr. Prem Das Chhetri (Sikkim), Mr. Mingma Sherpa (Sikkim), Mr. Ningmareo Shimray (Manipur) aser Ms. Swedesunuo Zao (Nagaland).

Health Dept. ajanga online HRMIS tenzükogo



Principal Director, Directorate of Health & Family Welfare Nagaland, Dr. Neikhrielie Khimiao ajanga August 17, 2021 nü web based online Human Resource Management Information System (HRMIS) tenzükba mapang tangokba noksa nung angur.

Dimapur, Luroi/August 18 (TYO): Principal Director, Directorate of Health & Family Welfare Nagaland, Dr. Neikhrielie Khimiao ajanga August 17, 2021 nü web based online Human Resource Management Information System (HRMIS) tenzükba liasü, kong Payroll Management System densema lir.

Iba sentong nung Dr. Vikato Kinimi, Director (Health Services), Dr. Lhouvizotuo Belho, Additional Project Director, Nagaland Health Project (NHP), Dr. Thanghoi Lam, State Program Officer, NHM aser Directorate aser NHP nungi ketdangsurtem dena liasü.

State nung public healthcare service agütsüba tashi itshitsü

nükjidong nung HRMIS system ya World Bank ajanga yariba Nagaland Health Project-i yanglu.

Iba system yagi health care nung inyaker yaritsü aser health system nung tongtipang HR inyakyim, talisa training, transfer, promotion amala digitize yimya nung record bendentsü.

Ajidang masü state nung HRMIS ajanga health HR indang payroll maparen digitize aser automate kumdaktsüsü.

Dr. Neikhrielie Khimiao-i iba sentong nung jembiba mapang state nung healthcare service, talisa COVID tashidak agi aliba ajunga sünger lia manemertem tajungtiba nung anepalutsü asoshi digital oset kota tongtipang, ta asüba indang jembiba.

MoHFW indang sentong nung aliba ama Nagaland nung NHM annual budget shilem 5-10 agi talila bendenloksü temsüa lir, ta Dr. Khimiao-i ashi.

Web-based HRMIS ya DoHFW, NHM aser NSACS nung inyaker ajungai web-based MIS mesüra Android application ajanga amshitetsü.

Integrated HRMIS indang link ya DOHFW indang website (www.nagahealth.nagaland.gov.in) nung angutsü.

Employee ajungai iba system nung pei indang login IDs amshia log in sütetsü, koba register süa aliba mobile number nung SMS ajanga angutsü.

Iba system amshitsü asoshi tejangja meratem website nung angutsü aser ano district shia dangi yoktsü.

Directorate of School Education ajanga metetdaksür

Dimapur, Luroi/August 18 (TYO): Classes V aser VI nung azüngba kaketshir atema Doordarshan, Kohima, All India Radio, Kohima, Youtube Channel (DoSE Nagaland) aser Facebook (School Education, Nagaland) ajanga Phase II Broadcast of Video & Audio lessons ya August 20, 2021 nü nungi tenzüktsü, ta

Directorate of School Education ajanga sangdong ka nung metetdaksü.

Iba sentong telemsa aser tarensen ya <https://dosenl.in> nung angutsü.

Temang tenük-telen mata-mabensai aliba kaketshirtem ajanzüktsü mechi video broadcast nungya sign language amshia

meypzükba inoka lir aser Classes VII nungi X nung azünger atema lesson tem broadcast asüba ya kobi melie tenzüktsü, ta ashi.

Taoba mapang sangdongba ama Online mode of education ajanga kaketshirtem angazükdaksütsü yimyatam ajaki achayanga amshitsüla, ta metetdaksü.

DC Noklak ajanga OPD Centre semzüktsüogo



Dimapur, Luroi/August 18 (TYO): Deputy Commissioner, Noklak, Hiazu Meru ajanga August 18, 2021 nü Sub-Center, High School 'B' Sector, Noklak Town nung OPD center ka semzüktsüogo.

Iba sentong nung jembiba mapang Deputy Commissioner ajanga ashiba agi, tang yanglua aliba Sub-center ya Noklak nung aliba nüburtem asoshi OPD center ka ama amshitsü. Iba OPD yagi health sector nung nüburtem lenmang tajungba nung tenzüktsü imlar, ta ashi.

District Task Force on COVID-19 senden amenba mapang Noklak nung nüburtem nem health facility tali agütsütsü mechi High School B sector nung OPD center ka amenoktsü lemtet. Community Health Center (CHC) Noklak ya junga liaka iba CHC ya COVID-19 Hospital kumdaktsüba sülen nüburtemi yangji temang anepalutsü nungnanga bilemer, anungji iba temelen tesem tasen ka anepalutsüsa akum, ta DC Hiazu Meru-i ashi.

Senior Medical Officer, Dr.

Victor NC aser CHC Noklak nung aliba staff temi OPD center tasenba nung inyaksü molunga aliba asoshi pelaba lemsatepba mapang DC-isa medical staff aser talisa nurse tem dang nüburtem temolung agüja tenzüktsü mepishia liasü.

Iba sentong nung Senior Medical Officer, CHC Noklak, Dr. Victor NC menden liasü aser Pushong, GB Noklak town ajanga o tatsüka jembiba liasü.

Iba OPD center ya Pastor A. Penglang, Longdon Baptist Church, Noklak Town ajanga meshiteta sarasademtsü.

Higher & Technical Education ajanga metetdaksür

Dimapur, Luroi/August 18 (TYO): National Scholarship Portal (NSP) kübok Post-Matric Scholarship CSS aser Merit-cum-Means scholarship maparen inyaksü asoshi session 2021-22 nungi tenzükba Aadhaar nung amendaker Institute Nodal Officers (INOs)- KYC jangjashiba maparen inyaksü aser iba atema INOs nem parnok indang Aadhaar number ya NSP Portal nung agüja lir, ta Higher Secondary aser Colleges ajanga nem metetdaksüogo.

Institute/Colleges tem iba maparen ya August 31, 2021 tashinung tembangtsü ajungshir, kechiaser iba ya medeni NSP nung online ajanga kaketshir indang scholarship application form tem jangjashiba maparen meinyaktetsü.

Item mapa inyaksü asoshi facility ya NSP Portal nung live agüja lir aser iba maparen inyakba mapang OTP ya INO indang Aadhaar nung register

süa aliba mobile number nung yoktsü.

Maneni osangtsüsang agitepba ajang aser OTP tem yoktsü asoshi NSP ajanga mobile number kasa ya amshitsüla.

INO ajanga NSP login ya KYC renemba sülen an NSP nung INO indang Aadhaar number amshia login sütetsü.

Institute KYC Registration apply asütsü atema link ya NSP (<https://scholarships.gov.in>) indang SERVICE section kübok angutsü.

KYC Registration Form fill up asüba mapang kanga kumdanga inyaksüla, kechiaser khen agütsüba sülen tanaben yanglushitsü makok.

KYC apply asüba mapang mera balala agitsü atema NOTIFICATION section kübok www.dtenagaland.org.in nung angutsü, Iba dak sendakba nung tali tejangjaba metetsü asoshi minoritynagaland@gmail.com dangi mail asütsü akok.



Department of Land Resources ajanga August 16, 2021 nü Mokokchung district kübok Anakiyimsen nungi kidanger state, Assam-i natural rubber sheet ton 15 yokogo. Item oset ya ADC Tuli, Shaying Sheu aser DPO, LRD, Dr. Sashiyangba nungertem lia yokogo.

Dimapur nung Fair Price Shop tem nem sempet agütsü

Dimapur, Luroi/August 18 (TYO): Tashidak wara agi tesem ajunga sünger aliba mapang Dimapur district küpok Fair Price Shop temi parnok dak alia/talila inyaka liasü. Fair Price Shop kiburtemi ani belem arema pei atema mebilemi inyakba asoshi aser ano külem FPS dealer-tem ajungmesotsü nükjidong nung Food and Civil Supplies Dimapur district den külemi District Administration Dimapur ajanga Independence Day, DDSC Stadium nung amongdang 2021 küm District level nung tajungtiba inyakba award Toshi Aier, FPS,

Naga colony, Dimapur; Village Council FPS, Padum Phukuri; Village Council FPS, Thahekhu Dimapur tem nem agaja liasü.

Jang-o-tzü ochishia shidak alemtsü atema Department of Food & Civil Supplies ajanga state nung aliba FPS ajak nung Electronic Point of Sale (ePOS) device amshidaksü.

Iba device ya ajanga teyari anguba nisung shia nem jang-o-tzü lemezüktsüba aser sen agütsütsü tejangja metetba nung yarir. Iba oset ya Aadhaar nung amendaker mapa inyaker aser biometric system amshia jang-o-tzü ya agütsür.

Assam Rifles ajanga Mkg nung Ex-Servicemen den sensaksem ali

Dimapur, Luroi/August 18 (TYO): HQ IGAR (North) kübok Assam Rifles, Mokokchung Battalion ajanga Mokokchung aser Longleng district nungi Ex-Servicemen tem den sensaksemba sentong ka August 17, 2021 nü ayongzuka agia liasü, kong Zila Sainik Board, Mokokchung nungi shilem tajung agia liasü.

COVID-19 tashidak wara agi alima tesem ajunga sünger lia sepai

tejen tem timtem balala ajuruba jangjatetsü aser ningdakba teyari agütsütsü mechi iba sentong ya ayongzuka agi.

Kasa mapang parnok nem sentong tasentem, pension teyari aser Ex-servicemen scheme tem angatetdakja liasü.

Iba ama sentong tajung ayongzükba asoshi Ex-servicemen ajanga Assam Rifles pur dang pelaba lemsatepa liasü.

Assam nungger truck driver tepsetba atema BDF-i lungkak ait



Meghalaya nung Assam nungger truck driver ka tepsetba anema Bodbarnü Barak Democratic Front (BDF)-i Silchar nung lungkak aitbayangi noksa nung angur.

Guwahati, August 18, 2021

(Agencies): Meghalaya nung Assam nungger truck driver ka tepsetba anema Bodbarnü Barak Democratic Front (BDF)-i Silchar nung lungkak ait aser parnoki aibelenertem merenshitsu takhangba agütsü.

BDF züngsemtemi Khudiram Bose indang kürakyanglu jakdang lungkak aitba sentong agi.

Karimganj district kübok Duhalia nungger truck driver ka Meghalaya kübok West Jaintia Hills nung tepset.

Iba nisung ya Duhalia nungger Dharendra Das'er jabaso Alak Das ta jangjaogo. FCI FSD Jowai kima nung

pa indang truck gari nung mejanga lia nisung anati Alak Das tepset.

Tenati Das tepsetba sülen pa indang truck gari nung FCI indang jang bosta 500 aliba bener Chansari FSD nungi ao.

Das indang tasü mangji lendong atalokdak nungi kilometer 5 shi pilar angu aser iba dak sendakba nung nisung ka puogo.

"Meghalaya nung iba ama lendong ya tang mezü ng atalokerba masü" ta Barak Democratic Front convenor Kalpar nab Gupta-i ashi.

"Barak nungi Meghalaya-i aoba truck gari driver temi mapang shia timtem ajurur.

Mapang talangka Meghalaya nung Barak nung alir aser Bengali nungeri timtem ajurua arur" ta paisa metetdaksü.

"BDF-i joko marezüküker aser nungdakra mapa tulu inyaksü. Mapa inyaktertemi pei kibong mesütsüla aser sorkar o Centre-i parnok kümzüka ayutsüla saka ibaji meinyaker" ta Kalpar nab Gupta-isa ashi.

Meghalaya nung truck driver Alak Das tepsetertem nem tapet temerenshi agütsütsüla, ta paisa ashi.

Iba sentong nung Barak Valley nungi driver aika aden. Parnoki asür kibong nem teyari agütsütsü takhangba agütsü.

MHRC Chairman-i Cherishterfield asüba bushisü ngdangtsü

Shillong, August 18, 2021

(Agencies): Taoba HNLC züngsem Cherishterfield Thangkhu i tepsetba atema

judicial enquiry committee ka shimogo aser iba luden nung mendenbubaji Meghalaya Human Rights Commission (MHRC) Chairman T Vaiphei lir, ta Meghalaya Chief Minister Conrad Sangma-i ashi.

Mawlai nung village headmen aser lennir balala senden ka amenba sülen Judicial enquiry nung

Chairperson inyaksü atema T Vaiphei shimba ajanga iba tatalokba jungjunga bushisü ngdang asütsü, ta Conrad-i ashi.

Mawlai nung village

headmen aser telok balala nungi lennirtemi August 13 nü Chief Minister nem memorandum ka agüja liasü.

"Vaiphei ya Meghalaya Human Rights Commission nung Chairman aser ano iba luden nung Chairperson asüba ajanga bushisü ngdang maparen shitak inyaktetsü" ta Conrad-isa metetdaksü.

Judicial enquiry committee ajanga bushitetba osang nung ajemdaker aibelener inyaktertem merenshitsu, ta paisa ashi.

Senden nung adenertemi tarutsü nungbo iba mesükba mita aoba mapa inyakdang iba tesem nung aliba headman den yaritepa inyaksüla ta Chief Minister dang ashi.

Meghalaya Governor indang escort garitem amak

Shillong, August 18, 2021

(Agencies): Shillong nung tensa mejungi aliba mapang ka nung Mawlai tesem nung Meghalaya Governor Satya Pal Malik indang escort garitem amak.

Mongulbar nikongdang 4:00 ako meta garitemji Guwahati Airport nungi Raj Bhawan, Shillong-i arudang lendongji ajuru.

Iba mapang mejangjatetba nisungtemi police escort gari ana aser Raj Bhawan indang gari ana raksatsü. Ajisüaka, iba

lendong nung nisung yiruyibongba mali.

Taoba HNLC tanishir Chesterfield Thangkhu i tepsetba sülen Meghalaya nung tensa mejungi kümogo.

August 15 nü Shillong nung Chief Minister Conrad K Sangma'er kidang petrol bombs pokdaksü.

State sorkaria tensa azüoktsü atema district 4 nung internet connectivity shibangtsü aser Shillong nung curfew alitsü ozü ng agütsü.

Mizoram nung mozü shibelener nisung 4 apu



Mozü shibelener ket nungi ngutetba mozütem yangi noksa nung angur.

Aizawl, August 18, 2021

(Agencies): Mizoram kübok Siaha jila nung nisung pezü ket nung Rs 3.5 lakh alangba heroin bena alia apu.

Yasü ng 11:40 ako meta India-Myanmar arrtsü anasa Bualpui (NG) Road nung mita aodang parnok pezü ket nung

heroin gram 124 bena lia apu, ta Mizoram excise & narcotics department ketdangsur kati tanü metetdaksü.

Par pezüji Gospel Vanlalliana (26), Vanlalnggheta (24), Runkianlova (41) aser Thanglianmunga (48) nungertem ta jangjaogo, ta paisa ashi.

Ketdangsurtemi mozü shibelendang amshiba Maruti Alto gari ka puogo aser par pezü anema 'The Narcotic Drugs & Psychotropic Substances Act, 1985' kübok ken o ka benokogo.

Excise & narcotics department ketdangsurtemisa Mongulbarnü Rangvamual tesem mita aodang yi yangluba tesem aika raksatsü.

Taküm January nungi August 17 tashi nung Mizoram nung drugs achiba ajanga tetsür 3 dena nisung 37 tashi süogo, ta Excise & narcotics department-i metetdaksü.

Kasa mapang Department-isa heroin seret 9.93 aser local yi litre 25,609 puogo aser iba dak sendakba nung nisung 1,877 tashi apu, ta parnokisa metetdaksüogo.



Manipur tsür aser Tokyo Olympics Silver medal angur Mirabai Chanu-i Amway aser Nutrilite brand ambassador inyaksü shimogo. Lai Nutrilite Daily, Omega aser All Plant Protein amala Nutrilite products indang ambassador inyaksü. (Imphal, August 18)

Tripura High Court-i tesayurtem temepishiba magizüker

Agartala, August 18, 2021

(Agencies): Tripura nung tesayurtemi Group-C aser Group-D mapatem meshiba ken o Tripura High Court-i magizük.

Iba petition ya mapa nungi anentsüba tesayur 10,323 tenü ng agütsü.

"Constitution nung Arrla 226 ajanga state sorkari department balala nung nisungtem shimoktsü tetuyuba agütsütsü makok ta ta shia lir"

State sorkari item

tesayurtem tanaben mapa nung shimoktsüba policy pusemer, ta mapa nungi anentsüba sorkar Tripura High Court-isa metetdaksü.

2014 nung Tripura High Court-i tesayur 10,000 tema tim mesüi shimok ta sür mapa nungi anentsüba telemtetba Supreme Court-i pusema liasü.

Tripura nung Biplab Deb-i aniba BJP sorkari High Court dang department balala nung tesayurtem anioktsü atema tebilemba meshia liasü.

Ajisüaka, High Court-i Tripura sorkar temepishiba magizük.



Bodbarnü Panbazar Police Station (PS) nungi Central Guwahati Police District (CGPD)-i Guwahati nung mozü shibelener ana apuba sülen agiba noksa angur. Tena ket nung sapong pongdang ana aser vials 99 nung heroin enoka aliba den plastic vial tazü ng 300 aser Rs 1,01,000 ngutetogo. Osang tejangja angazükba sülen mita aodang police-i Mehboob Ali aser Rongmola Begum na apu. (Guwahati, August 18)



TIR YIMYIM YIMOBILEM (EDITORIAL)

DIMAPUR YANGTEPNÜ, LUROI (AUGUST) 19, 2021

Aon masü aonpo melen!

Aonbo kasadang saka aonpo melener tonglem ama, Nagaland nung nisungbo kasadang aser yimten teloka kasadang saka government tenüng melenogo. Iba tenüngji People's Democratic Alliance (PDA) government ta aliba nungi Nagaland United Government (NUG) ta melenogo. Atangji, government tenüng melentsüsa akümbaji NPF telok nungi adoker tatartem opposition menden yutsür government nung adenba ajanga lir. Joko, Nagaland tatar senden nung Speaker achiji aser abelen amener ajakji Treasury bench nung amenertem asütsü. Tetezü tatar yimsüsür ajak Ruling party aser government nung adener kümogo. Aji oda, tatar senden nung government-i tai inyakyonga anema apusotsüsa tatar kata malinungji, opposition mali ajak government nung adentsü longjemba government dangji "Nagaland United Government" ta jatetbaji kanga peta jatetogo. Atangji, tetenzük dang nungi NDPP aser BJP na longjemer akümba PDA government nung kecha timtem melii yimsüsüa oa alidang ajungbena ka dang NPF teloka parnok den longjembaji aika atema taoksatsüka aser, ashiko, NPF asoshia tarutsü asoshibo takoksa asütsüa akok. Ajisüaka, NPF teloki opposition menden yutsür government nung adenbaji, parnok yimten nung jenjang tajungba ka aginüba agi masü mesüra rongsen penbuba agia masü saka Naga yimten tebilemstü ya menua melii yaktasa Nagaland tatar senden nung amener tatartem ajak ka kuma longjemer telemtetba kati arudaktsütsü nükjidong nung longjemer ta metetdaksütsü shitik atalokra, Naga nunger ajak yimjiyujung nung alitsü asoshi NPF teloki tenla tulu agütsü asütsü. Atangji, nisungi nisung mulungjang angutsü makok, aser nisung mulungjansa tekülakba, kanga majung ta Laishiba nunga Yeremia tapu 17 nung shia angur, anungji nisungi jembiba aser nangzükbaji mapa aser mapangi dang shitik asü tair ashitsü. Aji oda, kodang Naga yimten tebilemstü latettsü atema Nagaland nung alir MLA-tem ajak , opposition nung kata melii, government nung adenbaji bilemdangdir, shirang ajungtsü atema mozü kidangibo ao saka tashidak tai putet, anungji mozüa tai agütsü ta asüba mesüka lir. Kechiyong Naga yimten tebilemstü küm paikaya melatetteti aruba ya, India temzüng nung ammeter Tsüngrem tenüng nung India telongjem raksatsüsa kecha meinyaktsü ta tenangzükbaji agir Nagaland Legislative Assembly nung opposition aliba agi masü saka Naga nunger nüchiso bushirtem telok aika kuma lemsaba ajanga lir ta yimdong kazürtemi dena angateta lir. Anungji, Naga yimten tebilemstü ya menua melii latettsü bilemra, Nagaland Legislative Assembly nung amenertem masü saka Naga yimten nüchiso asoshi rarar NSCN aser NNC nung alirtemang longjemtsüla. Aji oda, Naga yimten tebilemstü latettsü makokba ya Nagaland Legislative Assembly nung opposition aliba ajanga lir ta putetbajibo tashidak tai puteta ta angateter aser Naga yimten tebilemstü latettsü atema Nagaland United Government akümbaji mozü tai zülutsü asütsüa akok ta bilemer. Ibaji shitik süra mozü tai achiba agi shirang ajungtsü melen tashidakang tamajungba kumadoktsü. Atangji, Nagaland nung alirtem tesünep nung jangratema chiajema lidi süra aonpo dang masü saka aon dena melentsüla. Joko, Naga yimten tebilemstü onük ya India temzüng kübok agiba election nung akoktsü asoshi benokba aser jembiba onük dangbo masütsüla. Nagaland state tenzükli nungi India temzüng kübok agiba election shia Indian National aser Indian Regional telok ajaki Naga yimten tebilemstü tatem kuma latettsütsü nangzüksü, anungji Naga yimten nüchiso bushirtema kasa election nungji shilem agitsü, ajisüaka election temerbo khen khen tatar senden nung o shilu benoka jembiba dak alaka yimten tebilemstü akoktsü asoshibo bendanga agüja inyakba mangur. Aji oda, aika asoshi Naga yimten nüchiso onük aser 16 Point Agreement onük ya election nung koker MLA akümstü asoshi tajemdakdak jenjangpongang tajung ka kuma amshiba angur. Ibaji nübertem asoshi temangmangtsüka aser lenirtem asoshia peisasa pei külaoktsüba mapa ka amato akümer. Shitikba Naga yimten tebilemstü ya latetdi ta bilemra, Nagaland tatar senden nung opposition dang masü saka Ruling-a malitsüla. Idangji dang Naga nunger aonpu tasen nung aon tasen teronem menema soa chitettsüsa mapang tajung arutsü.

OLEMSABANG

Khristan-tem zübazüba meli-i saksalema alitsü mapang tongogo

~ L. Kika Pongener

Tanü alima kara-a ainba den külemi Khristan tamangertema alima sobaliba/libaliro den külemi meyokteper kobala shitik/kobala meshitik aji mebendangteti, tamangba jenjang nunga seplasephitsüsa aiben tensa mapangi bentsür arur. Scientific technology, social media, political power etc. itum yagi tamangertem mashileni odaktsütsüsa aiben tensa mapangi bentsür arur. Anungji Khristan-tem zübazüba-a alitsüba mapang masü, kanga saksalema alitsüba mapang tongja tongogo. Talisa arogo nung toklang tenzükertem saksalema melira arogopurtem mashileni odaktsütsü aser arogo dena anokshitsü. India lima nung state kar nungbo Khristan-tem sadem-sadema mamangtetsüsa sorkar-i temzüng-ozüng yangluba osang kaketter nung azünger aser limapurtem Khristan kümdaktsür aliba tashiyim agi tanaben limapur yimsu dangi meyipdaksür. Social media balala nung tiyazü olulu otsü/osang tapu-tapu prokshiba agi Khristan-tem aika mashileni anir, scientific technology ajanga alima nung Tsüngrem tashi den toktepa mapa tapu-tapu inyakteter, itum mapatem ajanga alima nung Tsüngrem malia ta ashitsüsa tesungmangtsü mapatem aika ataloker. Tenyar Paul mapang nung, Galatia arogo nunga tiyazü tesayur kar adoker, Paul-i sayutsüngiba Yisu Khrista osangtajung nungi pila-a tanga tesayuba ka agi tamangertem aika mashileni odaktsü. Iba osangji angashia Paul-i parnok kümdanga/meita alitsü atema shiti zülu. "Khrista shibai pa taochi nung nenok aja, pa dak nungi pila-a tanga osangtajung dangi nenoki yakta aenshia aoba meteta ni sungmanger. Ibai tanga osangtajung ka masü, saka nisung kari nenok timtemdaksütsü asoshi Khrista osangtajungji melenshidaktsütsü meranger" (Galatia-1:6-7). Ashiko, iba tiyazü tesayuba sulen anidakertemji yimtsüng nung/ arogo nung tashi-tawar, taka-taiter, tongtipang nisung aika liasü sudi, mesura nutsüng nubu teimba liasü sudi, mesura iba tesayuba nungji manidakerbo libalirotsü mesatemtsüsa tensa tia liasü sudi. Ashiko, iba ama tensa tia jagi, tamangertem aika iba tesayuba sulenji anidaktsüsa aküm sudi. Kechiyong Galatia nung aliba tamangertem jagi nisung tsübuba agi Tsüngrem peladaktsütsüba dang nungibo nisung peladaktsütsüba tongtipangba sudaktsü. "Kechiyong tang nisung mulung chidaktsütsü ni bushir asü? Mesura Tsüngrem? Mesura ni nisung peladaktsütsü meranger ama? Ni nisung peladaktsütsü ni Khrista lar masü" (Galatia-1:10). Galatia arogo nung ama, tanü asen tendaka tamangertem mashileni aotsüsa tensa tia aiben ajurudagi. Tanü India lima nung aliba Khristan-tembo iba ama reshikangshi/timtem tia nung lir. Tia kaa asenokbo tanü tashi iba ama timtem reshikangshi agibo metongi lir, saka asenoka iba ama tensa tia jagi meneptsü kecha menua mali. Anungji Tsüngrem tenzükertemi anir tamangertem ajak kanga saksalema alitsüla.

Alima nung putu mapang shia alima putipuyang (scientific technology) melenshia/renloka aodang, akhidang kodanga mangashidangba/mengudangba tashitaka tapu-tapu pokteter. 20th Century tatemlen ka nungi, alima nung kodanga mangashidangba tashitak tasen AIDS & HIV ya poktet. Iba tashitak ya Shitsü (Mongkey) dak nungi menaba tashitak ta angazük, talisa iba tashitak ya nüktapangda/jabojari ajanga menateper ta tekümdangtsü tesayuba aika agüja aruogo. Iba tashitak yagi alima nung nisung taküm aika tepsetogo, talisa aier-asangur tapayutsü nubu tajung aika tepsetogo, ano mekümdangerbo aika tepsettsü, kechiyong ni aibelener ka mesura, iba tashitak nungi meshimeshia aneptsüsa ano tanü tashi mozü yangluteta mali. Ano küm ishika tejakdang nungi Swine Flu, African Flu, Japanese Flu, Dengue, Rubella etc. alima nung kodanga mangashidangba/mengudangba tashitak aika poktetogo. Itum tashitak ya Merila (Mosquito)-i Ak (Pig) dak metepba ajanga tashitak ya menaloktsür, aser Ak dak nungi iba tashitak ya nisung dak menatepa aor ta angazük. Itum tashitak yagia tanü tashi nung nisung taküm aika tepsetdagi. Anungji itumla tashitak nungjagi nisung taküm kümzüksü atema Scientist-temi mozü/ajem (Vaccine) yanglutsü maneni merangdagi aser karbo yangluteter taküm aika kümzükbaji asen tenüki ngua arudagi. Ano tang alima nung kodanga mangashidangba tashitak tasen ka 'COVID-19' ya pokteter nisung taküm million kwika tepsetdagi. Anungji iba tashitak ya nokdangtsü, aser iba tashitak nungi taküm kümzüksü asoshi mozü 'Vaccine' yanglutetdakjang ta Khristan-temi dang masü, tamang yimsu ajungai pei pei Tsüngrem dang telumiba aser sarasadem yinzü (Fasting and Chain of pray) ayongzüka sarasademogo. Atangji Tsüngremi iba sarasadem takhangbaji angashia 'COVID-19 Vaccine' ya kanga küraküra-a yanglutetdaksü sudi ta bilemer. Anungji vaccine yanglutetdaksüba atema tamanger ajaki Tsüngrem nem tenungsang kanga agütsütsüla.

Ashiko kodang COVID-19 tashitak ya tera tajungba nokdangteta odir, ano tanga tashitak COVID-19 dang nungi tesashiba kar poktettsüa kecha meteta maka, kechiyong alima nung nisunger tashitemtet kobateka renloka aor, patakaji timtem tekangshia renlokyonga aotsü. Ano tesatsü-ka, tamanger tajung karibo COVID-19 Vaccine ya magitsüla-a ta, olulu tapu-tapu prokba agi tamanger aika ratamata-a mangmangdaksür. Iba ama tamangertem ratamataba tia nung alidang Tsüngrem tenzükertem, putirtem, laishirtem ola madoki ajem-ajema malitsüla. Talisa, arogo nung toklang tenzükertemi Tsüngrem o den medemdanga arogopurtem nem rajema angatetdaksütsü kanga tongtipang. Kechiyong koba ama teküratiba nung vaccine ya nisung ajaki agidir, yamaji tashitak menatepba ya teküraba nung tajemba akümstü. Kodang tashitak menatepba ya tajemba kümdir, 'Lockdown' ya lapoktsü, kodang lockdown ya lapokdir, akhi ama inyaksangshiba mapatem sadema lapoktsü. Atangji lockdown ya tang amaisa ano mapang tatsüka atsülanga ora, alima rongsenketsüng jenjang kanga mejungi akümstü aser ayawara arutsü. Anungji Tsüngrem lartem, putirtem, laishirtem aser arogo nung toklang tenzükertem, nenoki ajemajema ola madoki repranga metoktsüi tamangertem meratatsüsa Tsüngrem o den medemdanga arogopur shia nem rajema angatetdaksütsüla, kechiyong tongmelang tamangertem aika olulu agi mangmangtepdagi. Anungji Tsüngrem lartem, putirtem, laishirtem aser arogo nung toklang tenzükertem, nenoki tima ta bilemra arogopurtem nem rajema angatetdaksütsü ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Jesuits Khristantemi Afghanistan nung mission mapa anenogo

August 18, 2021: August 16 nü Taliban teloki Afghanistan linük agiba sülen India nungi Jesuits teloki Afghanistan nung parnok mission mapa anenogo aser India nung putir anata iba linük toktsür ajentsü atema atadar, ta osang ka ajanga metetdaksü.

Missionaries of Charity nungia nun pezü Afghanistan nung lir aser parnoka pepei linüki aotsü, ta Arogo osang ajanga metetdaksü.

India yimtiba, New Delhi nung aliba Jesuit putir kati, "Ozü putir ana Afghanistan nung lir, aser tenati iba linük toktsüsü atema atadar," ta metetdaksü.

"Onoki Afghanistan nung mission mapa-a mapang telatet makai anenogo, kechiyong kodang ang tensa tajungba akümtsüar memetet," ta paisa metetdaksü.

Putir ana aser Missionaries of Charity nungi nun pezü densema India nung aikati iba linük toktsür India-i arutsü atema IAF tayimtsü atadar.

"Tang tashi nungbo Jesuits putirtem kümzüka lir, aser

Afghanistan toktsür arutsü atema parnoki India nung tayimtsü service atadar," ta August 17 nü putir kati metetdaksü.

Jesuits-i maneni Afghanistan nung mission mapa inyaksü tebilemba liasü saka tensa tamajungba akümba ajanga mission anena atar.

Kolkata nung amenoka aliba Missionaries of Charity headquarters nung lenir kati, parnoki yokba nun pezü Afghanistan nung lir, aser parnok rongnung kabo India tsür, ta metetdaksü.

1950 küm Mother Teresa-i Kolkata nung tentetba Missionaries of Charity-i Afghanistan nung temeim mapa balala inyaksü atema 2004 küm Kabul-i oa liasü.

Jesuit Conference of South Asia Tir, Stany D'Souza-i, Jesuits putir anaprong junga dang lir aser onoki tenaprongla den tongtepratepdar, ta metetdaksü.

Rara agi mejungi kongshiba linük, Afghanistan nung shisaliok agütsüba ajanga iba linük tanaben

yangershiba nung yariteptsü atema 2004 küm Jesuits putirtem Afghanistan-i oa liasü.

Taküm July ita nung interview ka nung jembidang Afghanistan mission nung tongti, Jerome Sequeira-i, "Onoki akok tashi maneni timtemertem nem teimla agütsüsü," ta metetdaksa liasü. Ajisüaka tang Afghanistan nung tensa tamajungba akümba sülenbo parnoki mission mapa maneni inyaksü asü meinyaksüar telemtetba magiteter.

2014 küm Taliban teloki Afghanistan nung Jesuit putir, Alexis Prem Kumar pua liasü ajisüaka 2015 küm February ita nung chiok.

2002 küm May ita nung Pope John Paul II-ia Afghanistan atema mission mapa tenzüker liasü.

Jesuits teloki tesayur 300 dak tema nem training agütsüogo aser tesayurtem jagi province pezü nung tanur 25,000 dak tema nem shisaliok agütsüogo.

Jesuit mission ajanga tetsür tanurtem taliba tajanzük nguogo.

Asüpila sentong nung shilem agiba atema ERCC nungi putir ka apu

August 18, 2021: Taküm June ita nung China nung Early Rain Covenant Church (ERCC) nungi putir kati asüpila sentong ka nung shilem agia adenba atema August 14 nü apuba sülen chiokogo, ta International Christian Concern-i metetdaksü.

2019 küm August ita nung putir, Li Yingqiang bail nung chiokba sülen nungi pa aser par kibongi mapang shia ketdangsertem ajurur. Pa ita 8 tashi tepuokdak ayuba sülen bail nung chioka liasü.

China Aid-i ashiba agi, August 14, 2021 anepdang 7:00 ako meta Deyang City kübok Longquanshan nungi police arua Li Yingqiang puer ao. Police station nung pa dang ghonda tenet tashi asüngdangyaba sülen nikongdang 2:00 ako meta chiok.

Taküm June ita nung Chengdu yimti nung Li-i Khristan asüpila sentong ka nung shilem agia adenba atema apu, iba dak alia tanga kulibo memetet.

Police-i pa dang joko

Chengdu-i maotsüla aser wara mapang kidang nungi mayazüktsü, ta metetdaksü. Early Rain Covenant Church (ERCC) ya Chengdu nung lir.

Police-isa pa dang, kidang nungi nai yimsü dak sendakba sentong kecha nunga madentsüla mesüra shilem magitsüla, ta tuyu.

Taküm küm tetenzüklen nungi Li'er kibong Deyang yimti nung alir aser mezüngbuba ita ishika nungbo police aser ketdangsertemi pa anema kecha meinyaki liasü.

ANOGO ABEN TSÜNGREM DEN

Ne taküm tebilemstsütem kü nem nunglokjang

"Anungji nenok dang ashir, nenok asoshi kechi achitsü mesüra kechi ajemtsü, mesüra ano nenok temang asoshi kecha abentsü ta shisa tebulu..." Mathi 6:25

Taküm nung khuret aser tebilemstsütem teimba teimba dang anogoshia akümer. Tarutsü atema bilemdang, aikati shih nung tashitak bendena ayipmajanger aser animesüngzükteti alir. Pi tsüngdang kecha masü amai sayuaka, kija alidangbo tanungba agi sünger alir. Yisui ashi, ozütemi shisa mebulur, parnoki ken atener, aser kecha meinyakia parnok anogo shia chiyungtsü angur. Asenok meimchir, Tsüngrem mesükba nung yanglua alirtem, item ozütem dang nungi taoba, anungji parnok dang nungi asenok tamang aser teimlaji tuluba, asenoki ang tali tali shisa mebului alitsüla. Asenok teyangluba ajak madak temaba aser pa mulungjang anasa aliba purtem lir. Asenokia iba amaji asen Tsüngremji mezüng südaktsürabang, asenok taküm tebilemstsütemji asen sasa khureta mabentsü.

Asenok rongnunga, kari sa tali shisabulur. Tsüngrem chir ka ama, asenok sobutsüji shisabuluji tesüdaktsü ta ashiba angateter. Aseni asen Tsüngrem dak rangloker, asen tebilemstsütem Pa nem nungloktsür, tangar ka ang yaritsü mulungtetra, iba jagi asenok tuluka yaritsü. Idangji asenok shisabulua kazüba nungi pilatettsü. Asenoki tangar ka taküm ajungkattsütsü meranga yaridang, asen tebilemstsü apibo, parnok khuret tuluba ta ngua, asenok temoatsür taküm ka akümtsü aser aji agi asen Tebu Tsüngrem sentsüwangshidaktsütsü.

SARASADEM

Kibuba, kü taküm ya tangar kar atema temoatsüba taküm ka kümdakjangma. Amen.



Ao Baptist Arogo Mungdang (ABAM) Women Ministry ajanga sponsor süa Zeme Baptist Association kübok tetsür 20 nem pei aki-alu nungi züsentetba nungi koda apijema chiyongtsü tajung yanglutettsü ta asüba sayuyim Peren Ao arogo nung 17-18 August nung takok ngua agiogo. Iba sentong nung ABAM WM secretary Mrs. Alemla Mozur, Mrs. Alila Pongen VTPC supervisor aser Mrs. Arenla Longkumer Women Coordinator parnok ajanga training takok ngua agütsüogo. Rongsen aser mapang tenla tulu agüja Zeme tsürtem atema mapa tajung aika sayutetba atema Rev. Asenba Imsong, Coordinator Zeme Supportive Mission ajanga pelaba lemsateper.

OLONG PAITEP # 5910

	1		2			3		4		5
6								7		
					8		9			
			10							
11										
					12					
13		14		15						16
17								18		

TIPILEN		LANGTSÜNGLEN	
1. Inyaker ajangetba	- (3)	1. Meshidak	- (3)
3. Bangsemo adokdak	- (5)	2. Tanaben soshir	- (7)
6. Shitak mesüi inyak	- (7)	3. Iba anogo	- (4)
7. Ya mimong nung angur	- (3)	4. Meshi	- (3)
9. Repranzük	- (4)	5. Yagi mi tsükloker	- (9)
10. Tasola	- (5)	6. Shi tapu ka	- (9)
11. S _ _ _ _	- (4)	8. Yagi ayimer saka ozü masü	- (3)
13. Yagi ajak ashioktsür	- (3)	9. Ajokba shiruru ka	- (7)
15. Ki aokba oset	- (7)	12. Inyaktet	- (4)
17. Ak shi nung inokba tasen	- (5)	14. _ _ _ hi	- (3)
18. Ishika	- (3)	16. Akümüli nungi pilar	- (3)

OLONG PAITEP # 5909 TELANGZÜBA

TIPILEN :		LANGTSÜNGLEN :	
1. Telok, 4. Aluru, 6. Ozüng, 8. Emk,		1. Tenükjang, 2. Luden, 3. Kioksü,	
9. Kin, 10. Teti, 12. Süir, 13. Jen,		5. Lenti, 7. Tajangzük, 11. teronem,	
14. Ola, 16. Talak, 17. Mazük.		12. Sempa, 13. Jahaz.	



NÜKNARAR ALOKBA O WARAKLA NA :



Künü anogo Alokba ATM ka nung lia Waraklai ngua lai yakta dang atsüker message kar yamai yok:

Warakla : Honey, na mejangya lira künem pungmang ka yokang, na lesson züngya lira künema lesson kar yokang, na chiyungya lira chi tilaka yokang, na by chance ATM nung lira sen tilaka yokang.

Alokba : Ni metsü-meshidak lir, tzü asü telong, koba yokla?
Lilir : WhatsApp

TANÜBO NAI LANGZÜANG

Q. Koba küm Paralympic Games mezüng asaya liasü.
A.1956 B.1968 C.1986 D.1960
_____ (Taruba adok nung onoki langzüsü)
YASHI ADOK TELANGZÜBA : 2013

AO OSHI ANGAZÜKDAK:

TANÜ ANGAZÜKTSÜBA OJANG



Kongrep
(v) Tilaba küma akong (shrivel)
* Anü kanga tsüka apuba agi süngolio ajak **kongrep**.
Kongro
(n) tebenjem aiür (young lady)
* **Kongro** tajungi tsürabur mapa nung yarir.

Happy Birthday

TENÜNG : KILANGAJUNG LONGCHAR (CHUCHUYIMLANG)

Tasoba anogo : 19-08-2012
Class : 3
School : St. Francis de Sales Hr. Sec. School.
Talidak : Medziphema Town.

Jala Küm teku (9 yrs) abensaba Tepela Salem Tsüngrem sentsüwangshi asoshi lemsateper.Ya tashi Tsüngremi tesüngmangtsü meima aniogo. Maneni asen Teyanglur Tsüngremi anema aliba taküm den arishi talang moajangma ta sarasademtsür.

-Temeim Oja, Oba & Baby Oranen.



NAI-A YA METETTER MA?

INDIA NUNG TONGTIBANG DAM KAR:

DAM	STATE	AYONG
- Bhavani Sagar Dam	Tamil Nadu	Bhavani
- Tungabhadra Dam	Karnataka	Tungabhadra
- Rihand Dam	Uttar Pradesh	Rihand
- Maithon Dam	Jharkhand	Barakar
- Koyna Dam	Maharashtra	Koyna
- Bisalpur Dam	Rajasthan	Banas
- Mettur Dam	Tamil Nadu	Kaveri
- Krishnarajasagar Dam	Karnataka	Kaveri
- Indira Sagar Dam	Madhya Pradesh	Narmada
- Cheruthoni Dam	Kerala	Cheruthoni

SUDOKU # 5951

TELANGZÜBA # 5952

6			9	5	3		2	1	8	6	4	7	9	3	5	
		2	1				5	3	6	9	8	1	4	2	7	
		4			1	8	7	4	9	2	3	5	6	1	8	
		9		1	7		9	7	5	8	1	2	3	6	4	
	6	5	4		3	2	3	2	1	4	5	6	8	7	9	
	8			5	9	4	6	8	6	4	7	9	3	1	5	2
9	5					3	6	9	7	3	2	8	5	4	1	
	3		9		6	5	1	8	2	5	6	4	7	9	3	
		1	6			4	4	5	3	1	7	9	2	8	6	

OJANG LUTEP # 5496

CHKEI :

APMA :

AKDINYIR :

ASTAMA :

NGJUA :

SADASHINGER :

ENASÜLNG :

MALAJEUA :

AKINY :

TEKANZÜNG :

OJANG LUTEP TELANGZÜBA # 5495

PEI DANG AGITSÜ BILEMA MERUMERUA INYAKDANG
AIBEN TEMENEN MENATSÜSA AKÜMER

TAN HOPTA ATEMA - KOMA SÜLA ?

Q. Clean election takok angutsü atema voter shia dangi "ni' vote mayoktsü" ta sign südaktsüyonga Signature campaign sentong ka agia ao nunga koma süla ?



Lucknow, August 18, 2021: Bodhbarnü Lucknow nung Uttar Pradesh state Assembly nung state nung osettsüset jenjang maneni atuba onük nung o lemtepdang opposition züngsemtemi longkak aitba noksa nung angur.

Sorkari Afghan nungi India nunger ajak anir arutsü: Scindia

Shajapur, Luroi/August 18 (Agencies): Union Civil Aviation minister, Jyotiraditya Scindia-i, 'Vande Bharat Mission' kübok India nunger anir aruba ama Afghanistan nungi India nunger senso ajak anir arutsü atema sorkari inyakdar, ta metetdaksü. Yaküm coronavirus wara tamajungtiba mapang nung Vande Bharat Mission tenzuka linük balala nungi tayimtsü ajanga India nunger anir arua liasü. Mongolbar aonung Madhya Pradesh kübok Shajapur nung osangbeneretm den jembidang Jyotiraditya Scindia-i, "Vande

Bharat Mission kübok bendanglen nungi India nunger anir aruba ama India sorkari Afghanistan nungi asen sensotem Air India aser Indian Air Force (IAF) tayimtsütem ajanga anir arutsü," ta metetdaksü. Scindia-isa, Centre sorkari taoba Hokolbar nungi tenzuka India nunger Afghanistan nungi anir aruba maparen tenzükogo, ta metetdaksü. "Sensotem anogo asem tashi anir arua liasü, ajisüaka Amongnü tayimtsü ka apusotsü lia Kabul airport nung injang khadokba sülen tayimtsü lenmang nung lendong

ajurutsüsa aliba tekümdangtsü osang pilots nem metetdakja liasü," ta paisa metetdaksü. Tekümdangtsü osang metetdaksüba sülen Kabul airspace shibang, ibayongji Hombarnübo sensotem anir aruba maparen nung tetsükdaksü adok, ta pai ashi. Mongolbarnü IAF tayimtsü ka Kabul-i aoba sülen India nunger anir aruogo, ta pai ashi. "Afghanistan nungi asen sensotem ajak anir arutsü atema onoki akokba tashi inyaktsü. Tamalen Vande Bharat Mission kübok-a onoki yamaji inyaka liasü," ta minister-i ashi.

Ita 9 tsüngda LPG Cylinder ka nung sen 265 tashi tuogo: Congress

New Delhi, August 18 (Agencies): Centre sorkari LPG cylinder ka nung sen 25 atuba sülen anogo ka lir Bodhbarnü Congress Party-i sorkar aija, tesüiba ita 9 tsüngda sorkari LPG cylinder ka nung sen 265 tashi tuogo, aser ibaji shilem 44 atuba lir, ta metetdaksü. Yaküm May ita nungi tenzuka sorkari cooking gas nung subsidy magütsür, ta lai ashi. Shrinat-i, "2014 küm subsidy agütsüba nung sen 1.47 lakh crore adok ajisüaka 2021 budget nungbo tajemba

atuba sülen Delhi nung LPG cylinder ka nung sen 859 jungogo," ta metetdaksü. Laisa, yaküm November ita nungi tenzuka tang tashi nung Centre sorkari LPG cylinders nung sen 265 tuogo aser ibaji shilem 44 atuba lir, ta metetdaksü. Yaküm May ita nungi tenzuka sorkari cooking gas nung subsidy magütsür, ta lai ashi. Shrinat-i, "2014 küm subsidy agütsüba nung sen 1.47 lakh crore adok ajisüaka 2021 budget nungbo tajemba

lemzükja 12,000 crore dang kümogo," ta metetdaksü. Osangbenertem senden nungji Congress party otongdartemsa- Alka Lamba aser Radhika Khera nata liasü. Shrinat-i, totzü saru ajanga sorkari sen 4.53 lakh crore aazükogo saka nübur nemo tajangzük kecha magütsür, ta ashi. June ita nung domestic cylinder ka nung sen 809 liasü aser July ita nungbo sen 834 aküm. (Maneni tapak 9 nung...)

Sunanda Pushkar asüba ken o nung Court-i Shashi Tharoor maitisür

New Delhi, August 18 (Agencies): Taoba mapang Union Minister aser Congress Party lenir, Shashi Tharoor kinüngtsü, Sunanda Pushkar Delhi nung aliba five star hotel ka nung asüba ken o nung Delhi court special judge, Geetanjali Goel-i Tharoor maitisüi obendang agütsüogo.

Tharoor-i judge dang pelaba lemsatepba den külemi pai court dang, 'tesüiba küm tenet ser tesadang tashi ni kanga reshikangshia aruogo, aser tangbo anisüngzük'er' ta ashi. Video conferencing ajanga iba ken o angadangba sülen Special Judge, Geetanjali Goel-i iba obendang agütsü. Iba obendang agütsüba mapang nung Tharoor-a liasü.

Geetanjali-isa counsel anaprong dang pelaba metetdaksüba den külemi lai, iba ken o angadangba mapang lai tangazükba aika kaogo, ta ashi.

Ken o angadangba mapang nung police-i arlla 306 (soseta asütsüsa inyakba) densema Tharoor anema ken o balala benoka liasü.

Tharoor atema ken o

jembitsür senior advocate Vikas Pahwa-i court dang, Tharoor anema benokba ken o ajakji tai ta SIT-ia bushitetogo, ta metetdaksü.

2014 küm January 17 aonung Delhi nung aliba hotel takdang ka nung Sunanda Pushkar sür lia angu. Tharoor'er official ki yanglushiba ajanga tena iba hotel nungji telidak liasü.

La tasümgang anguba sülen Delhi police-i IPC Arlla 498A aser 306 nung ajemdaker Tharoor anema ken o benoka liasü, saka iba ken o nung pa mapu.

2019 küm August 31 nü Delhi Police-i Delhi court ka dang Pushkar asüba ken o dak sendakba nung Tharoor anema ken o benoka ken o akatsü mepishia liasü.

Tamalen Additional Public Prosecutor, Atul Kumar Shrivastava-i, post-mortem ajangabo la miim chisema asü ta metetdaksü, ajisüaka la dak yiruba zübo 15 liasü aser item züboji ghonda 12 nungi anogo pezü tsüngda aketba liasü; item züboji atsütepba/raratepba mapang aketba liasü, ta metetdaksü.



August 18, 2021 nü New Delhi nung "International Police Expo 2021" nung police kati raraba hadir ka amdangba noksa nung angur.

Democracy nung nübur ola alitsüla: SC

New Delhi, August 18 (Agencies): Centre sorkari melungtet telok kari benokba temepishiba ken otembo court-i magizüksüla, kechiyong parnoki sorkar telemtetba balala anema temepishiba ken o balala agütsür, ta ashiba aija Supreme Court-i, democracy linük ka nung ola adoktsü atema nüburtem nem temelaba agütsütsüla, ta metetdaksü.

Melungtet telok- Common Cause tenümg nung advocate Prashant Bhushan-i benokba temepishiba ken o ka Centre sorkari ashishia liasü.

Tang teinyakdak ED Director, Sanjay Kumar Mishra kümsük küm ana aliba nungi küm asem kümtsütsü atema sorkari inyakba maparen Common Cause-i ashishia ken o benok.

Sorkar atema jembitsür Solicitor General Tushar Mehta-i Justices- L Nageswara Rao aser B R Gavai nati akümbe bench dang, tawa-tanü

melungtet telok kari inyakba mapatemji court-i ashishitsüsa lir, item rongnung sorkar telemtetbatem anema temepishiba ken otem agütsüba densema lir, ta metetdaksü.

"Ibaji ajanga nija mesüra organisation kari ozümg alema inyaker. Indian jurisprudence kübok organisation karbo temepishiba ken o benoktsü atema dang tenteta lir, aser itemji magizüktetsüla. Temepishiba ken otem dang agütsübaji nija mesüra organization mapa ka masü. Item ama organisation-i temepishiba ken otem bendangshidanga benokba ajanga iba court nükjidong mataloker," ta Mehta-i bench dang ashi.

Ajisüaka Supreme Court bench-i, "Nenoki ashiba kulitem jagi mabensar aser melungtet teloki benokba ken o atema obendang agütsütsüla. Democracy linük ka nung nüburtemi ola adoktsüla," ta metetdaksü.



New Delhi, August 18, 2021: Lahore nung Maharaja Ranjit Singh indang kürakyanglu raksatsüba anema Bodhbarnü New Delhi nung Pakistan High Commission kima BJP züngsemtemi longkak aيتدang police-i longkak aiteritem apuba noksa nung angur.

Covid-19: Israel nung tenokdangba tasen agütsür

Jerusalem, Luroi/August 18 (Agencies): Israel nung Covid tashidak prokshia aoba nokdangtsü nükjidong nung Bodhbarnü nungi tenokdangba tasen agütsüogo. Israel nung nüburtem aika nem vaccine agüjatokogo saka January ita nungi tang tashi nung tawa tashidak nisung timba dak potetba ajangshia arudar.

Deobarnü tetuyuba tasen agütsüba nung, lokti adenshiba tesemi aoba mapang vaccine agiba certificate sayutsüla mesera coronavirus tashidak tendangba indang negative report sayutsüla. Tesemtem rongnung restaurant aser bar tem, sobalib aser saisapong sentongtem, hotel aser gym tem densema lir, ta health ministry sangdong ka ajanga metetdaksü.

Kasaji synagogue, mosque mesera tekülemdaki oa külemnürtemi iba tetuyuba sülen anidaktsüla aser item tekülemdaki nisung 50 dak tema adenshitsu memelar.

Iba den bendenloksema store, shopping mall aser industrial park tem nung seven square metres (75 square feet) tsüingda nisung ka dang melatsü.

Taoba kum December ita vaccine agütsü tenzükba sülen Israel nung iba inyakyim tajung ajaki agizüka aruogo aser iba ajanga tashidak menatepa aoba tajemba kümdaktsü.

Ajisüaka tang Delta variant agi animesor tashidak kanga kara prokshia odar aser June ita tenokdangba agütsür aliba aginba maneni July ita nungi benoker arudar.

Hopta ishika tsüingda Israel nung arishi kum 50 aser temapurtem nem booster shots agüja arudar aser arishi kum 12 temapurtem dang vaccine agitsü ajungshia arudar.

Israel nung tang temsüa aliba lisopur million ka shi nem vaccine magütsü lir.

Health ministry sangdong ka ajanga ashiba agi, Mongolbarnü nisung 8,700 tema dak tashidak potetogo, koba January ita nungi tang tashi nung anogo ka nung nisung timtiba dak tashidak potetba asütsü.

Ato Kilonser Naftali Bennett-i Israel nungertem dang vaccine agitsü ajungshia arudar aser vaccine magijemi lira taruba ita Jewish nunger benjung nung kongshitsu akok ta tekümdangtsü metetdaksa arudar.

Taoba Afghan tir Hamid Karzai-i Taliban lenir den ajurutep



Kabul Luroi/August 18 (Agencies): Taliban commander aser Haqqani Network militant group lenir tejen Anas Haqqani-i, taoba Afghan tir Hamid Karzai den ajurutepa sensaksemogo, ta Taliban lenir kati Bodhbarnü Reuters dang ashi. Karzai meina Afghan National Reconciliation Council tekolakba Abdullah Abdullah oa liasü.

Haqqani Network ya Taliban nung tongtibang telen ka aser August 15 nü Kabul atsüingba sülen parnok kanga tongtibang kumogo. Iba network ya Pakistan arrtsü nung amenoka lir aser kum tem tsüingda Afghanistan nung tesem balala amakba atema parnok aija lir.

Taoba tir-i Kabul chirepba sülen Taliban lenirtem den sensaksema arudar. Afghan sorkar tarutsü atema inyakyim atsülangshia Taliba züngsem masürtem anioktsü atema Afghan yimtiba nung sensaksema arudar. Taliba lenir tejen Amir Khan Muttaqi-i, Kabul nung taoba yimden

yimsüsürtem den sensaksema arudar aser tatemsa August 17 nü sensaksemogo, ta Associated Press sangdong ka ajanga metetdaksü. Taliban otongdar Zabihullah Mujahid-i, sorkar tasenba nung ajak anisemtsü ta shiogo.

Sensaksem jangja aliba source kati Associated Press dang ashiba agi, sorkar tasenba kümtettsü asoshi osang tajung lir aser anogo ka ana tsüingda sorkar tasenba kümtettsü imlar. Tawa sensaksem ya taoba kum 20 tsüingda nüburtem nem temeden agütsür alibatem Taliban-i aniba sorkari koda anepalutsü iba dak rangloker sensaksema arudar.

Muttaqi amala Taliban lenir shibai toba yimsüsüba mapang education minister mapa bena liasü, parnoki tir Ashraf Ghani-i linük toktsür mao tsüingda Afghan nunger yimden yimsüsürtem den ajurutepa sensaksemogo. Paisa, ajak longjemer sorkar kümtettsü atem US den sendaktepa aliba warlord tem dena ajurutepa liasü.



Afghanistan yimtiba Kabul kübok Wazir Akbar Khan tesem Taliban sepaitemi meita aliba noksa nung angur. Linük amokbangba sülen Taliban-i taitok agütsütsü sangdongogo aser tetsürtem dang parnok sorkar den longjemtsü ayongzükogo.

UK-i Afghan nunger 20,000 nem tejenokdak agütsütsü

London, Luroi/August 18 (Agencies): United Kingdom-i kum ishika tsüingda Afghan nunger 20,000 nem tejenokdak agütsütsü, ta Boris Johnson-i aniba sorkari Mongolbarnü metetdaksü. Iba sentong kübok mezüingbuba kum Afghan nunger 5,000 nem tejenokdak agütsütsü, ta UK home secretary Priti Patel-i BBC News dang ashi.

Taliban-i linük ajunga amokbangba sülen nüburtem tetsübu agi süngogo aser Taliban yimsüsüba kübok timtem tekangshi tulu ajangshitsu tsüba Afghan nungertem linük toktsür jenshia ao tenzükogo. UN Refugee Agency (UNHCR)-i ashiba agi, takum kum tetenzüklen nungi tang tashi nung nisung 400,000 pei ki toktsür aotsüsa kumogo aser 2020 kum linük kübok tesem balala nung Afghan nunger million 2.9 tesem balala

nung prokshir alirtem den parnoka densemogo.

"Taoba kum 20 tashi Afghanistan tajungba küma yanglushitsu asoshi inyaktepba mapang onok nem teyari agütsürtem dang ka pelar aser aji onok sentsüh lir," ta UK Ato Kilonser Boris Johnson-i ashi. "Parnok aika aser talisa tetsürtemi onok teyari nüngdaka lir," ta pai ashi.

Guardian sangdong ka ajanga ashiba agi, Boris Johnson-i aniba sorkar indang refugee resettlement scheme ya talisa tetsür, tanur aser tamangba yimsü dak sendakba nung nütsüing agi ajema alirtem dak rangloker inyaktsü aser kum pongu tsüingda Afghan nunger 20,000 nem United Kingdom nung tejenokdak agütsütsü.

Afghan nunger atema resettlement scheme tasenba mesangdong tsüingda UK PM

Boris Johnson-i, meimchir temeden dak sendakba nung mepetmesü adokba nokdangtsü atema international partner tem longjemtsü nüngdaker, ta ashi.

Afghanistan nungi US sepaitem anin tenzükba sülen UK-ia linük nungi sepai tanungbatem aninogo. British nunger sepaitem tang Kabul nung UK nungertem aser British sorkar atema mapa inyaka aliba Afghan nungertem anintsü atema inyaktepdar.

Kasa mapang nung British Ato Kilonser Boris Johnson-i Bodhbarnü, Afghanistan nung Taliban yimsüsüba tasenji o agi masü saka inyakyim agi bendangtsü ta ashi. Islamic militant teloki linük atsüing sangdongba sülen anogo ka lir tang UK PM-i iba olen lemsatapa liasü. Taliban ya Islam yimsü dak sendakba nung temzüing ozüingtem dak akang

akang amitba telok ka lir aser parnoki Sharia temzüing ozüing kübok temedentem akhümtsüba bentshitsu ta ashi.

"Onoki iba yimsüsüba ya parnok o agi masü saka parnoki telemtetba agiba aser parnok inyakyim, kiralongraradak sendakba nung parnok jenjang, azütokshiba, temesepba mozü shibelenba aser meimchir temeden aser tetsür tanurtem kaket shisatsü bushitsu atema temeden agütsüba dak ajemdaker o bendangtsü," ta Johnson-i British Parliament nung ashi.

Bodhbarnüsa Johnson-i Pakistan Ato Kilonser Imran Khan den sensaksemogo. Phone ajanga jembiba mapang Johnson-i Khan dang Afghanistan nung yimsüsüba tasenba ya telok ka mulungba nung dang masü international jenjang nung agizüktsüla, ta ashi.

US-i parnok sepaitem aninba sülen anüolen aliba linüktemi teyari agütsüba sorkar ya kum 20 lir chirepogo. Taliban-i linük atsüingba den tir Ashraf Ghani linük toktsür jena aoba sülen tang alima nung lenirtem Taliban yimsüsüba dak sendakba nung telemtetba agiba mapang ka lir.

Hombarnü Russia-i ashiba agi, parnok yimsüsüba tasen inyakyim tamasa meita atatsü, aser iba sülenang telemtetba agitsü, ta shiogo. Kasa mapang nung China sorkari Taliban yimsüsüba den tesendaktep tajung yanglutsü merangtsü, ta shiogo.

British Army tekolakbaia Afghanistan nung sorkar tasenba ka atema maangka agütsütsüla ta ashiba den anüolen aliba linüktemi kiralongrar ta jaloktsür aliba telok ya khuret abenba telok ka ta meteta arutsü akok, ta ashi.

Phek nung HSLC & HSSLC exam nung takok angur tushi



Tawa sangdongba HSLC aser HSSLC tatidang nung takok anguba kaketshir nem tenüngsang agütsüba sentong ka Bethany-2 Youth Organisation Phek Town ajanga August 18, 2021 nü Phek Town nung ayongzükba nung Wetsho Lasushe EAC Phek ajanga kaketshirtem ayongzükba jembidang tangokba noksa nung angur.

Dimapur, Luroi/August 18 (TYO): Phek district nungi tawa sangdongba High School Leaving Certificate (HSLC) aser Higher Secondary School Leaving Certificate (HSSLC) nung takok anguba kaketshir

nem tenüngsang agütsüba sentong ka Bethany-2 Youth Organisation Phek Town ajanga ayongzükba agia liasü.

Iba sentong ya Wetsho Lasushe EAC Phek ajanga moatsü. Sentong nung jembiba

mapang, kaketshirtemi takok tajung ngutetba atema Lasushe-i tenüngsang agütsü aser tarutsü wadang asoshi moaja liasü, aser maneni tsüraburtemi bendanga agütsür yariba atema pelaba lemsatepa liasü.

Pai sentong nung shisaliok kota tongtibang, iba nungi tajangzük amala indang lemsatep aser kaketshirtem pei nükjidong ataloktsü asoshi meranga inyaktsü aser aziungtsü ayongzükba liasü.

Iba sentong nung colony balala nungi lenirtem aser temolungertem dena liasü. Sentong ya Dzesekholie Keditsu, Statistical Secretary lenisüba kübok agi aser Metshenilo, Asst. Edu Secretary ajanga tajungshi o jembi.

Maneni Bethany-2 Youth Organisation tir Vedekho Venuh ajanga tepela ankep o jembia liasü.

Tening nung tentet balalai sorkar dang pelaba lemsatep

Dimapur, Luroi/August 18, 2021 (TYO): Tening nung aliba Government High School, Government Higher Secondary School agi melentsüba atema, Tening Village Council (TVC) chairman, Palengkengbo, Tening Students Union (TSU) President, Ngauphuthlak, Tening Village Women Organization (TVWO), Akhenge aser Tening Village Youth Organization (TVYO), Mathiusung nungeri

sangdong ka ajanga State Sorkar aser School Education Department dang alakteta pelaba lemsatepogo.

Iba tesem nung alir nübürtemi mapang talangka nungi yongya ataba maparen ka asangsang nung mapa küma inyakba asoshi tepela temaitsü sayua, item tentet ajanga Chief Minister, Neiphiu Rio, Advisor, School Education, K.T.Sukhalu aser Advisor,

Water Resources, Namri Nchang nunger danga pelaba shisem.

Iba High School, Higher Secondary agi melentsüba ajanga, sensaker kibongtem/senotsü peria malir tsüraburtemi pei chirnurtem tajung kümdaktsütsü atema temaba kaketshirtem bushiba tsütsü nungittsü asoshi lenmang/maangka lapoktsür, ta tentetmeti metetdaksü.

Wokha nung Coffee Cafe lapoktsüogo



Wokha, Luroi/August 18, 2021: Wokha nung 'Coffee Cafe' lapoktsüba mapang, Director, Land Resources, T. Renben Lotha den tanga ketdangsürtem külemi tangokba noksa ka yangi angur.

Wokha, Luroi/August 18, 2021 (TYO): Mongolbarnü, Wokha nung Director, Land Resources, T. Renben Lotha-i 'Coffee Natural Nagas Cafe' lapoktsüogo.

Iba sentong nung Director, Renben Lotha-i, shishilembadak anguba coffee tanga den medemdangra, Nagaland nung adokba coffee kanga agi tajungba lir aser tawa tanü coffee sapua ajemer aika kümogo, kong linük nung State balala aser alima tesem balala nung nubur aiakti Nagaland nungi adokba coffee kanga sapur, ta ashi.

meranga inyaktsü aser akok tashi coffee ajemtsü asoshi pai ajungshia liasü.

Lotha-i ashiba agi, coffee lu meranga inyaka aser asen iba luyim takok ngura Nagaland nung temelenshi tulu adoktsüsa alima tesem balala nungi raliwalirtem atsüa arutsü akok. Iba den külemi linük nung rongsenketzung ajungkettsütsü asoshi coffee lu ajanga shilem ka agitsü akok.

3E's- Employment, Environment aser Economy nung anidaka coffee ajungkettsütsü asoshi Land Resources Department indang nükjidongtem pai lemsatepa

liasü. Tang, Department-i küm 30 atema 'NOBLE CAUSE COFFEE COMPANY CAPE TOWN SOUTH AFRICA' den MoU ka sign süogo, ta Lotha-i metetdaksü.

Coffee lu ayimba wadang ajungkettsütsü asoshi, Coffee Board of India aser Land Resources Government of Nagaland den longjemer coffee lu ayimertem nungita yaridar, ta pai ashi.

Kasa sentong nung, Deputy Director, Land Resources Nagaland, C. Vanchamo-i, coffee lu ayimtsü atema Nagaland ya tesem tetemjen ka aser coffee lu ayimba ajanga takar mesüra sensaker mebandanger aser lotki nung nisung mashi kati coffee tsünütsü/lu ayimtsü akok, ta ashi.

Coffee Natural Nagas Cafe lapokba sentong nung aruagi adenba atema, Proprietor Coffee Natural Nagas, Steve Odyuo-i Department dang pelaba metetdaksü.

Iba sentong nung DPO, Land Resource Department, Wokha, Tepunol Yore menden liasü. Iba sentong nung Joint Director, Land Resources, Albert Ngullie, department ketdangsürtem aser tanga tongtibang nisung tem denogo, ta kasa sangdong nung shia lir.



OFFICE OF THE
AOYIMKUM VILLAGE COUNCIL
DIMAPUR DIST. : NAGALAND

TENÜNGSANG AGÜTSÜR

Aoyimkum Village Dimapur nung alir **Wb. M. Chuba Jamir** aser Wt. W. Imkonglemla na jabaso, Wabang Jamir IPS, IGP, (INT-1) of Gujarat police nem India nunger 75 buba Independence Day 2021 benjongmung nung mera taket President of India Police Medal for Meritorious Service sempet agütsüba asoshi Aoyimkum Village Council ajanga pelaba lemsateper aser tenüngsang agütsür.



(Imchainba)
Chairman, AVC

(Putunungsang Lkr)
Secretary, AVC

Pelaba Lemsateper

"Tenüng tajungji senti mozü dang tajungba aser tasü nüji taso nü tajungba" Sayutsünger 7:1

Onoki kotanga amatsü makokba asür **Zulutemjen** Longpa pa shirangba anogo nungi tasüba anogo tashi kija aser kibong, tembar, kiyonger, arogo, yimten, lokti balala shirnokisa sarasadem, nübo, shisatsü, rognsen agi ozü yaritepogo nenok ajak dang kanga pelaba lemsateper. Nenok tangi arua meshitetaka asen Tsüngremi nenok ajak moajang ta sarasademer.



**Temeim kinungtsü,
semchir aser kinunger.**

**Asoba: 1.4.1949
Asüba: 12.8.2021**

In the Court of
Principal District & Sessions Judge
Mokokchung : Nagaland

S/C NO. 135/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of Late Imlamaran Ao has been applied by Smti. T. Amenla, D/o Lt. Imlamaran Ao R/o H.No 139 Changki Village, Mkg. Nagaland for possession of:

Family Pension, PPO No. 4744/68, Closing of A/c

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of 30.8.2021

Given under the hand and seal of the court on this the 30.7.2021

Sd/-

Principal District & Sessions Judge
Mokokchung : Nagaland

Women Helpline Nagaland ajanga metetdaksür

Dimapur, Luroi/August 18 (TYO): Technical tsütsü timtem kar ajanga Women Helpline Nagaland number 181 ya tarutsü nung osang magütsü tashi mamshi alitsü, ta Women Helpline Nagaland ajanga sangdong ka nung metetdaksü. Ajisüaka tetsürtem timtem balala ajurur alirtem mesüra

tetsürtem dak sendakba scheme aser sentong balala nung osangtsüsang aginertemi temelen number 9485239098 nung tongteprateptsü akok, ta sangdong ajanga ashi.

Ajidang masü district ajunga nung amenoka aliba Sakhi- One Stop Centres (OSC) kati oa item osang agiteptetsü akok, ta ashi.

Ita 9 tsüngda LPG Cylinder ka ... (Tapak 7 nungi...)

Ato kilonser, Narendra Modi aija Congress lenirisa, "2013 küm June ita nung Modi-i, Delhi nung aliba sorkar (UPA sorkar) yimsüsüba kübok jenjang atuba ajanga nübürtem timtemer, ta aija liasü. Iba nungji tiyazü mali, kechiyong tang jenjang maneni atuba ajanga linük nübürtem timtemdar saka sorkari nübür khuret pungbatsütsü atema LPG jenjang majemer," ta ashi. Ujjwala scheme aija lai, "Sorkari Ujjwala scheme atema tenüngsanga jembir, ajisüaka

nütsüng crore 23 kanga sensak tiai (below the poverty level) aiba sorkari amadokogo. LPG cylinder ka nung sen 859 agi ayoker süra nisung kwikati iba jenjang jagi alitetsü?" ta asüngdang.

Sensakertem khuret pungbatsü atema sorkari tangsa LPG jenjang ajemtsüla, ta lai takhangba agütsü.

LPG dang masü saka petrol jenjanga maneni atuba sülen mapang tatsüka jenjang matur. Tang Delhi nung petrol litre ka nung sen 101.84 agi ayoker.

Bayern Munich-i German Super Cup kokogo



Luroi/August 18, 2021

(Agencies): Mongolbarnü German Super Cup asaya nung Robert Lewandowski-i goal ana idakja Bayern Munich-i goal 3-1 agi Borussia Dortmund madak takok nguogo, aser iba ajanga coach Julian Nagelsmann nem mezüngbuba takok agütsüogo.

Poland nung asayar shibai taoba season otsü tasen ka yanglua Bundesliga nung goal 41 idaktsü, pai minute 41buba nung mezüngbuba goal idaktsü aser Marco Reus-i Dortmund atema goal ka idaktsüba sülen minute 74buba nung tasembuba goal idakja liasü.

Nagelsmann Bayern nung arua denba sülen preseason friendlies asaya pezüprongla nung takok mangu aser

Hokolbarnü Bundesliga nung mezüngbuba asayaa Borussia Mönchengladbach den draw nung tembang.

"Ni takok marok benden tenzüknar. Taoba mapang coach tem aser asayartemi takok marnok aika bendenogo," ta Nagelsmann-i Bayern coach ama mezüngbuba takok anguba sülen ashi.

Super Cup asaya metenzük tsüngda taoba mapang Bayern aser West Germany nungi nüngtugu asayar Gerd Müller nem tetushi agütsüba sentong ka agi, shiba Deobarnü arishi küm 75buba nung süogo.

Bayern puri tajungba asayaa tenzük saka goal idaktsütsü atemabo Reus-i maangka tajungba ngutet, ajisüaka

Manuel Neuer-i pa tetsüng tachimilen agi ball kanga junga nokdanga liasü.

Dortmund nungi arishi küm 16 tain asayar Youssoufa Moukoko-i goal idaktsüogo ta bilem saka pa offside liasü aser ano Erling Haaland-i metsüba ball ka Neuer-i kanga junga nokdang.

Iba sülen asaya mezüngbuba shilem tembangtsü lia Serge Gnabry-i agütsüba ball ka Lewandowski-i kanga junga tongokja liasü.

Asaya tanabuba shilem tenzüknar minute 49buba nung Alphonso Davies-i agütsüba ball ka Müller-i kanga junga idakja parnok goal 2 agi tejakdang aküm.

Iba sülen Haaland-i goal ka idaktsü saka pa offside asüba agi goal magi aser minute 64buba nung Reus-i Dortmund atema goal ka idaktsü.

Telok ana tsünga kanga toktepa asayaba sülen minute 74buba nung Lewandowski-i par team atema tasembuba goal idakja parnoki asaya akok.

Tanur ka surgery atema Andrejczyk-i Olympics medal auction asü

Luroi/August 18, 2021

(Agencies): Polish javelin thrower Maria Andrejczyk-i tawa tembangba Olympic nung lai ngur aliba silver medal, arishi küm ti tain tebur chanu ka temulungjang surgery agidaktsütsü atema teyari agütsütsü asoshi auction süogo.

Andrejczyk indang silver medal ya convenience store company Poland Zabka Polska-i USD 125,000 agi alizük. Andrejczyk indang silver medal atem bid asüba akokba sülen Zabka Polska-i la nem medal meyipa agütsü.

Tokyo Olympics nung tetsür javelin throw asaya nung Andrejczyk-i nület m 64.61 tsüteta tanabuba jenjang nung tembang. Arishi küm 25 tain asayar ya China tsür Liu Shiyang sülen tanabuba jenjang nung tembang, shibai nület m 66.34 tsüteta gold medal angu.

Medal auction asütsü atema telemtetba agiba indang jembiba mapang Andrejczyk-i, telemtetba agütsü atema mapang talangka magi, kechiyong lai la indang sempet tongtibatiba yoka pa yarinüa

liasü, ta ashi.

"Ni mezüngbuba fundraiser nung shilem agiogo aser iba fundraiser ya tetemsü ta ni meteta liasü," ta la indang Facebook wall nung August 11 nü zülutsü. Poland nung tebur chanu ka tenüng agi Miloszek atema iba fundraiser ayongzüka liasü. Pa temulungjang nung timtem tulu lir aser surgery agütsü nüngdaker.

Tanubosang ya Stanford University nung surgery agütsü, ta Daily Mail sangdong ka ajanga metetdaksü. Iba fundraiser ya par kinungertemi Polish zloty million 1.5 bendentsü atema tenzük.

Andrejczyk-i auction asüba silver medal ya la asoshi Olympics nung anguba mezüngbuba medal liasü. 2018 küm Andrejczyk dak bone cancer puteta liasü. Tashidak potetba sülen küm ka lir la 2019 European Team Championships Super League nung tanabuba jenjang nung tembangba sülen World Championships atema qualify asü. Ajisüaka la World Championship nung qualifying round nung tsük.

Japanese Grand Prix kümnabuba thiogo

Luroi/August 18, 2021

(Agencies): Coronavirus wara pokteter aliba ajanga küm anabuba atonga Japanese Grand Prix thiogo, ta Formula 1-i Bodhbarnü metetdaksüogo.

Race ya October 10 nü Suzuka nung asayatsü liasü, saka F1-i ashiba agi, Japan sorkari linük nung wara kanga kara prokshia aoba ajanga iba Grand Prix ayongzüka masayatsü atema telemtetba agiogo.

Japan nung tang coronavirus tashidak kanga kara prokshia aoba ajanga timtem nung lir aser Tokyo densema tanga tesem aika nung state of emergency benoker lir.

"Linük nung corona wara ajanga tensa kanga mejungi kümdaktsüba apir Japan sorkari iba season race athitsü

SVYO-i Football coaching camp ka ayongzüka agidar

Dimapur, Luroi/August 18

(TYO): Sovima Village Youth Organisation (SVYO)-i achaayanga Football coaching camp ka ayongzüka agidar.

August 18 nü Sovima Village Local ground nung iba camp lapokba sentong nung Village

Chairman aser Head GB den yimdak lokti tentet balala lenirtemi arua shilem agiogo.

Arishi küm 4 nungi 30 tsüngda nisung 60 shi iba camp nung shilem agütsü atema züngoksema lir, koba ita ka tepeyong agütsü.

World U20 championship lapokba sentong nung India team Abu Metha lenisüba nung shilem agi



World Athletics U20 Championships nung India team leader Abu Metha aser India team wako amsang Kunwer Ajai Singh Rana na den tanga asayartem Nairobi, Kenya kübok Kasarani Stadium nung asayamung lapokba sentong mapang tangokba noksa nung angur.

Dimapur, Luroi/August 18

(TYO): Athletics Federation of India Associate Vice President aser team leader Abu Metha lenisüba nung Indian team, Nairobi, Kenya nung World U20 Athletics Championships lapokba sentong nung shilem agiogo.

Asayamung lapokba sentong ya August 17 nü nü nüngtugu Karanani Stadium koba dang Home of Heroes ta ajar iba tesem nung agia liasü. Covid dak sendakba nung tenokdangba balala agütsür

aliba ajanga asayamung lapokba sentong nung linük tenüng nungi nisung pongungui dang shilem agidaktsü.

Iba sentong nung India team wako amerji Kunwer Ajai Singh Rana liasü, shiba tebur Javelin asaya nung tokteptsü. India team nung coach aser staff densema züngsem 38 lir. Tang mezüngbuba India team World Championships nung northeast nungi lenir ka lenisüba nung oa shilem agidar. Asayamung laokba sentong nung AFI tir Adille Sumariwala-a dena liasü.

atema telemtetba agia liasü," ta F1-i sangdong ka ajanga metetdaksü.

Iba season nung Australia, China, Canada aser Singapore nung Grand Prix athiba sülen tang iba telemtetba ya agiogo.

F1-i ashiba agi, Japanese Grand Prix melena kong asayatsü iba idang telemtetba tang tashi magi-i lir.

"Mapanglem melenshitsu atema Formula 1-i tang asatepdar aser taruba hopta telemtetba agiba ka sangdongtsü," ta kasa sangdong ajanga metetdaksü.

"Taküm aser 2020 küm tensa mapang mejangjaka lenmang nguteta aoba Formula

1 kuli agütsüogo aser taküm Formula 1 asaya ayongzütsü atema tejangraba sayuba ajanga kanga pelar."

Japan MotoGP koba October ita asayatsü liasü, iba race yaa June ita thitsüogo.

Suzuka circuit koba 2022 nung küm 60 ajungtsü iba circuit nung 1987 küm nungi tang tashi nung GP 31 ben ayongzüka asayaogo aser drivers tem world title 11 ben tashi iba tesem nung jangjaa liasü.

April ita Japanese GP promoter aser F1 tekeloktemi 2024 küm tashi Suzuka nung maneni race asütsü ta sangdongogo.

BILEMDANGANG

"Teraksatsür masü teyanglushir kaka kümang."